

千  
山  
詩  
集

千山詩集卷八

博羅剩人可禪師著

書記今羞編

五言排律

雪齋落成

四海少鄰並，況茲東復東。登堦惟鶴跡，掛壁有詩筒。豈  
爲兒孫計，聊安君子窮。委懷存宋榻，論事據枯桐。千卷  
萬卷在，兩人三人同。快談當聖代，高咏寄玄穹。雲過一  
林影，月來諸境空。難容金絡馬，共老竹編蟲。世界半窓  
隔，神明寸管通。囊開餘積雪，簾捲渡飛鴻。稠疊深秋色，

三言集 卷一  
渾含太古風人情輕故舊天意勘英雄覽鏡添髭白燒  
泉掃葉紅浮生只若此大業在其中前往後猶待隱然  
抱厥躬

宿西寺

破寺背城郭開門對巘岼流雲時入席看斗獨凭欄松  
落子堪拾菊荒英可餐偶行出籬外閒眺入林端意靜  
鳥俱息身微葉共殘更無人問訊自與月相干池瘦荷  
衣碎徑斜鶴影單疎髭先雪白賤骨抵風寒扶杖返虛  
閣吹燈臥草團人生苦不足得此良已難

老叟

何來孤獨叟自道腹中饑人戶睂先皺登階力已衰生  
年曾不記近事幸無知鬚髮留前代鄉鄰失舊時延齡  
憑布袋移步仗松枝但憶身方壯世途甚坦夷

壽苗鍊師

人間初換歲天上亦添齡未老耿南極能飛滯北溟時  
艱驚蝶夢神王鄙熊經寒雪尚凝砌和風已拂局吹笙  
鸞鳳集念咒鬼神聽度世心尤切彌年手不停侶沙蟲  
猿鶴名雨電雷霆采藥重薇蕨汲泉帶參苓肝腸關衆  
命呼吸通羣靈展卷辨蝌蚪退身號螭蜃雖知守其黑  
無計得以寧殘魄子將朽方瞳爾獨青金莖潤菜色丹

室吐蘭馨談笑具別旨往來各忘形他山足玉石一水  
合渭涇高志存鴻鵠大光眩燭螢胡爲懸萬石徒自擊  
寸莛兔穎空盈匣魚腸待發劍波流豈復返膏腴可長  
熒不見大椿樹八千終飄零

同社中諸子賦百韻

荷與洛多士共此海一涯慘日無舒景惇颺不斷吹晝  
聞蒼兕吼夜見亂星垂春盡花未發秋來草先萎況當  
嚴凝際復遇荒歉時雪大頗克嚙沙多曷任炊已看新  
似桂安得稼如茨食字字欲盡問神神不知求方希辟  
穀繞樹嘆無枝世路腸千折人情水半卮曳裾向何處

彈缺更依誰却憶公孫度難尋鍾子期馬公思設帳董  
氏久虛幃罪積甘縲紲泪紛比縷縻出門徒孑孓矢志  
各參差家遠地難縮愁寬天可彌寄書憑塞雁解佩欠  
金龜祗覺絲生鬢惟餘肉在髀囊空存兔頰貂敝羨羊  
皮心腹告山鬼鬚眉照碧池矮簷常抱膝永夕獨支頤  
縱爾貧兼病幸無磷與溜投林藏霧豹入市怯人螭曾  
國衣冠族秦中豪傑兒嵐烟五嶺遠文藻六朝摛鹿走  
看葵逐鶴飛並雉罹赤髭經火劫鐵嘴試剛椎君父恩  
固極死生苦不辭求仁又何怨質聖而無疑智爲繁憂  
長力因多難羸形容雖已槩精理肯教墮文偃剝跛脚

香嚴無卓錫但存乞食相那用買山貲托鉢望城郭談  
經開邊陲運頽知莫振衲破尚堪支濯足烏龍窟洗腸  
白石滑長江還森森歸鳥正提提梅塢懷方切春塘夢  
獨稀終朝勞短策暗室拭長釭虹氣供吞吐鯨波靜指  
揮四維陰幕幕兩袖冷颼颼荒塚臥封豕歆臺遊瘦狸  
擡眸瞰廣漠縱步陟屺屨屢涕吐牛蛇走叫呼霹靂馳東  
溟觀出日北鎮讀殘碑西岫哭義士南鄰舞閼氏乾坤  
仍自濶陵谷儵然移傾血倒三峽招魂到九疑揭開王  
蠋面喚起卞壺尸膽但當空瀝肝惟對佛披怪思屠魍  
魎險欲狎窮奇幽意通岩瀑閒情侶澗麋崩崖搜朽骨

古廟索遺詞僊客遇清笑玄風布和熙雨關去莫返華  
表來何遲承露澆麻飯燒檀煮玉飴解將新布袋剖却  
舊藩籬屍許從沙暴車寧荷鍤隨洪濤咒可竭頑性法  
難治屢過楊雄室每逢安石棋冰心互映徹蘭味播芳  
藜交誼人已棄遺文良在茲艱虞深閱歷道勁共扳追  
矻矻千尋石汪汪萬頃陂土牀容偃仰細帙任晤呖古  
栢信孤挺狂猿本不羈雄談裂幘幅妙句出鑪錘驟雨  
催吟興寒霜沁詩脾分題多吊古造意欲凌巖殘墨堪  
同賞新篇足自怡桐枯未作爨松實暫療饑二子喜聽  
論一鐫盡成麋且拋千載憾相與片時嬉小人應學圃



遺老亦數菑豈懟賊能射宜安命所施管寧曾戴帽尼  
父欲居夷吾道信東矣先生將何之只聞囚羑里疇爲  
獻鷄斯左氏三都貴蘇卿五字師傳巖築以版渭水釣  
非罷野蕨欣猶采社蓮恨已衰山東得李白江左來桓  
伊執耳爾胡讓登壇衆所推吹笙約子晉擊筑邀漸離  
異域留商嘒石人見漢儀空城招舊帝青草惜娥眉騷  
續屈平怨賦添宋玉悲唱酬渾不厭來往各忘疲酒柰  
無貲畜節應到禿持雜心勿與入拙日儘教強此日亦  
常事萬年定渴思好將藏洞壑何必勒鍾彝取義戒傷  
激懷刑嫌近癡果能了性命更莫問安危鳳鳥徒鳴舜

龍圖只授羲滔滔者皆是蹙蹙若奚爲世事詎難識帝  
心可微窺浮雲無終蔽皎月豈長虧盈則覆之兆禍兮  
福所基舉頭語諸子毋自苦嗟咨

贈遼陽陳令公十韻

聖朝恩舊里孤客宦邊官冷兼冰冷身形似鶴形升  
堂除積雪編戶補疎星衣剪殘荷碎厨炊野蕨馨尋僧  
分鉢飯對吏讀基經新市憑鵝集重關畏虎局草荒連  
砌白山近到牀青采木探幽谷弓田步遠垌人貧惟有  
愛訟少不須聽立德存華表書名在御屏竚看寒磧上  
丹鳳下天廷

偶述二十韻

憶昔歲戊子投荒自我初舉頭多局促那步獨躊躇所  
苦非冰雪相期在壑渠主人法漸弛賤子罪方紆身首  
幸無慮心神尚未舒逢人強笑諱暗地足欷歔者舊常  
分粒高朋許借書便將好日過不覺數年餘雙屐窮梵  
宇盈瓢飽野蔬飄飄無定止處處得安居衰病因無禁  
孤貧益自如偶然值老叟招我入茆廬增外無諸響瓶  
中有夙儲殘編堆几滿寒月映窓虛雲密塵難入山空  
夢亦除以茲知足矣何必嘆歸與信口歌吟富關門禮  
法疎長林藏倦鳥幽澗縱潛魚寄問同流者爲歡信有

諸  
皇仁應普及天意豈私予

千山詩集補遺

七言律

和澹心因圃阻雪思歸

又見千山絕鳥飛，閒拈玉麈對君揮。  
綏綏白晝荒城路，淅淅寒生破衲衣。  
糞火芋香聊共剝，梅村夢斷未言歸。  
年年風雪棲廡下，惆悵殘更憶翠微。

同澹心咏介子庭中蠟梅

處士庭前續舊歡，數枝開遍共團圓。  
瓣當白雪偏能見，名托浮山亦耐寒。  
金色頭陀花底笑，黃衣舞女夢中看。  
珊瑚籬何處吹橫笛，穠穠躊躇到夜闌。

哭繩海先生

素車猶憶十年前生死交情更不遷  
曾記郵筒傳嶺月獨齋鏡老破江烟  
何人報國身能在賴汝孤臣節已全  
一瓣香消寒淚濺亂鴉啼上古城邊

廣陵感賦

舊堤楊柳不成裁劫火經今五十回  
瓦碎尚餘香粉膩市喧疑是野魂哀  
高飛獨羨楊州鶴倚杖難尋月觀梅  
祇爲繁華易消落遍將清淚點寒灰

朱溪臣臨行再被价竊作此奉慰并以言別

兩年飄泊石城東垂死憐君病復同  
窮鬼憎人寒不徹

黑貂誨盜數仍空家鄉路遠心逾苦海角天傾恨未終  
舊社梅花看欲發一枝惆悵老西風

對與治懷莞羊諸同志

論交茲夕復何疑屋角參橫動遠思今世幾人堪久別  
他鄉惟子許相知但看綠漲流桃葉已是朱明負荔枝  
去住總來成繫念一生憔悴此情癡

路中

石頭曾共典寒衣五月光分幾雁飛前路烽烟愁正劇  
一春花鳥願多違還家莫話滄桑事遲我常開夜月扉  
江水茫茫悲倦翮何時同採故山薇

臺中

無聊長寄一枝筇  
悔不同君四百峰  
舊榻儘容獐虎待  
半鐙常煮野雲供  
到家應共憐窮子  
博飯無如學老農  
從此入山惟穩睡  
只愁僧打五更鐘

博中

數別何曾見淚痕  
長干落日自吹壩  
故園一任荒叢菊  
急難方知憶弟昆  
小雨滴生春草夢  
西風飄送老梅魂  
爲懷正好愁冬際  
蘆葉蘆花江上邨

荒中

蓬轉長空跡未孤  
栢林能不念吾徒  
回何敢死還多畏



柴也其來幸是愚強把笑歌酬不石空令涕淚滿江湖  
浪遊愧我恒終歲白首曾成一事無

廣中

出門又過半年期獨夜心情黯自悲鄉夢似隨風雨入  
歸程仍爲甲兵遲一生未了嵩間淚萬里長縈澗畔思  
想得生還重見面幾人歡動藕花池

秋夢

荒原寂寂落花鈿錦瑟閒拋五十絃蟬咽未離芳樹裏  
馬嘶偏繫畫堂前甄山道士傳兵解陽羨書生合醉眠  
盡向湖船載西子城頭空見草芊芊

蜚聲

驅馳鎮日自空餐  
剩有逢迎好結歡  
流涕可堪客賈誼  
無魚終欲笑馮驩  
共誇金穴千年滿  
閒倚冰山半夜寒  
一著未施全局盡  
弈碁曾不似長安

聞黃石齋至

驚傳一騎到江干  
繞遍梅花淚未乾  
鄧禹幾能扶漢室  
鍾儀終不改南冠  
空餘短劒龍文暗  
好付殘軀馬草寒  
豈爲綈袍今哭汝  
澣天風雨正漫漫

寒夜偶成

木佛寒燈共一堂  
漫思往事浩茫茫  
何曾辱我非能忍

無柰恩多未易忘門掩疎鐘人自古更殘薄被月如霜  
吾生猶及梅花發豈必羅浮是舊鄉

初聞警友人約同入嶺作此答之

長安花事獨相關荔子丹時尚未還無可藏身惟酒肆  
何須埋骨向青山一瓢以外無餘物荷插相從便不閒  
到處飽飡到處死故人多淚自潺潺

壽界繫師兼約同遊羅浮

身形似鶴古來稀深谷梅花冷共支坐破蒲團千頃月  
閱窮滄海兩莖眉閒知歲月終堪惜老愛雲山亦是癡  
爲囑趙州行脚處麻姑峰畔荔支期

次韻答邢孟貞并以道別

高樓春盡恨難刪  
每見君來一破顏  
客夢荒烟迷去道  
平生知己重名山  
却憐遠別逢梅雨  
早願餘年入玉關  
幾處草菴燒不盡  
秋來猶得掃苔斑

留別王子京

璚璆破衲掛枯藤  
敢道無情淚又增  
不爲金錢思長者  
每從處士揖孤僧  
甘貧但酌空江水  
受樹仍留異代陵  
長想政閒無一事  
一軒明月話高朋

留別顧與治

嶺海無家亦有憂  
歸心卹復戀狂遊  
頻年獨寄楊雄宅

此後誰登謝眺樓  
永夜月來僧不管  
一春花落鳥空愁  
茫茫正溯長江水  
何日重過問石頭

留別余澹心二首

次韻

春風猶滯秣陵關  
曉夢先飛黃木灣  
弟妹可能存世上  
笑啼徒自向人間  
三年不見雲中信  
一鉢終歸何處山  
最是與君情不薄  
悠悠去住兩難刪

敷天處處谷爲陵  
剩水殘山見老僧  
乞得一食常自足  
饒他百事總無能  
關心獨有池生草  
白首何堪鼠噬藤  
歸去把茅詩卷在  
思君常剔佛前燈

留別白門諸公

不因行樂亦蹉跎幾度柴門石易過豈有文章逢運使  
屢將香飯乞維摩三山花落催行棹五嶺雲飛返舊柯  
莫歎江流千萬里鶯啼無限夕陽多

次鄭元白韻

烟縷城頭日未斜曾來乞食到君家于今年代非當日  
始信人間有落花雨後每尋黃葉寺春殘惟聽白門笳  
臨岐無住悲鴻漸爲數庭前樹上鴉

次余澹心韻二首

家本飛雲白石龕偶言來去亦優曇遺篇青簡千年事  
山月蒲團一杖擔此日曉風歌柳岸他時高閣坐江南

摩騰翻譯渾多故身外累累貝葉函

摘葉燒泉處士齋幾翻相向寫幽懷看殘今古無天眼  
踏破青山有草鞋雁去休教虛隻字猿歸應已共層崖  
世間定亂非裴度雪夜何人更度淮

次林茂之韻二首

數間茅屋水東涯四海爲家不當家鉢底已無兼宿食  
籬邊猶憶隔年花典型獨喜先生在風雅徒令異代誇  
自笑僧貧遠行腳擔頭猶有舊袈裟

憶昔相逢未是僧青山處處總堪登斑斕子舍終天恨  
花草吳宮百感興周粟價高思義士羊裘典盡笑嚴陵

莫言我去知心少但過牆東有好朋

陳伯璣和余留別與治詩見贈復次原韻答之

日歸日歸我心憂野草荒烟失舊遊幸是天涯逢有道  
相投杖策上高樓西山遺老留雲臥贛水新魂帶月愁  
話至傷心窓又雨何年重約虎溪頭

繫中生日二首

稽首牟尼古佛圖今朝猶剩舊頭顱縱經萬死知何恨  
欲盡餘生亦是虛破寺獨松撐日月短牀閒夢到江湖  
從他知罪渾無涉納納乾坤一病夫

三十七年事事非兩行新淚點田衣世間白日還容我



海上青山未許歸天意每於窮極見故人不爲病多稀  
明朝好惡休須論且共團圓話日暉

右七言近體詩三十一首皆

禪師丙丁間寓金陵所作者稿存黃華寺瀋陽原集  
未之載也梓事將竣黃華主人始出相示不及依次  
編入附諸卷末另爲補遺一卷云

千山詩集卷九

博羅剩人可禪師著

七言律一

甲申歲除寓南安

梅花嶺下小溪邊  
寒盡孤僧淚獨漣  
衲底尚存慈母線  
擔頭時展美人篇  
先皇歲月餘今夕  
故國風光憶去年  
香冷夜深松火息  
萬方從此靜烽烟

乙酉元旦

萬年新曆自今朝  
兵氣都隨殘臘銷  
龍虎山河開舊域

鳳凰宮闕集羣僚波停海外來重譯千舞階前格有苗  
野老辦香無別祝簞瓢處處聽歌堯

秋蟾八首

乙酉寓金陵作

鐵騎飛傳海上音彤雲靄靄幕秋陰元戎已作檻中虎  
黃閣空留井底金半壁久添亡國恨翠華難繫老臣心  
獨憐白首商人婦重撥琵琶淚滿襟

日光暗淡鵑鵲寒獨上牛車淚已湍魏絳讀來成畫虎  
文山到死願黃冠鄉心未盡鼙聲急陵樹先凋鶴夢殘  
正擬招魂秋草裏疎鐘微月夜漫漫

露下霜殘冷碧霄鄉心處處長天驕雲橫淮海三千笳

風定錢塘六月潮  
石虎豈能消殺伐  
盧敖無計慰飄搖  
何時重問峰頭侶  
夜半吹簫過鐵橋

倚杖逢人塵偶揮  
風流還說舊王畿  
赭衣少婦能騎馬  
白面書生學打圍  
是處烽烟迷笠屐  
年來藥碗失芳菲  
菱荷葉老虫聲切  
惆悵家山未可歸

美人家住白雲鄉  
獨上高樓枉斷腸  
丹荔剝餘蕉正熟  
素馨開遍柚初香  
人間何處尋黃鵠  
夢裏分明見石羊  
莫向鳳凰臺上望  
秋風秋雨正茫茫

翹首長空動晚颺  
蒼梧一去失歸期  
啼魂欲擬三更月  
續命先傳五色絲  
天壽山前雲漠漠  
石頭城上草離離

傷心玉葉凋零後猶剩天南第一枝

涼月團團照遠空  
荻花如醉蓼花紅  
江湖無復藏鷗迹  
天地何曾享馬醕  
已見旄頭沉贛水  
又聞大旆出秦中  
只今五嶺無消息  
望斷長干數落鴻

長松千尺野烟迷  
別館蕭條日已西  
廿載功名歸夢蝶  
五更風雨聽潮鷄  
曲池涼浸桐花影  
複道塵封御墨題  
燕子重來王謝改  
庭前芳草馬空嘶

乙酉除夕二首

窮年于役笑狂夫  
掩却閒窓一事無  
對佛不殊棲影鶴  
懷人欲折渡江蘆  
浮山夢裏梅難寄  
鼙鼓聲中日易徂

今夕劇憐燈火冷夜深空照幾僧孤

小雨空濛罩遠天愁心只在水雲邊  
半生事業髣髴雪萬里音書嶺上烟  
爆竹不煩驚旅夢殘花留得伴枯禪  
魚聲梵唄渾成淚破衲蒙頭又一年

丙戌元旦顧家樓

多難還餘善病身栖栖終不怨風塵  
挈瓢戴雪逢遺老著屐尋詩有故人  
夜雨暫將山色改年光又逐淚痕新  
遙知鄉國東風早花信憑吹薄海春

丙戌歲除卮亭同衣白雙白方魯諸子

到處看山歲已徂梅花點點怨江湖  
南陽事業歸何地

東魯旌旗仰大儒拜月盡瞻新面目窺池不改舊頭顱  
世間亦有閒于我共向方亭伴結趺

丁亥元旦昧庵試筆

每逢遺老卽留連病骨支離不記年但有心胸還宇宙  
更無眼目借人天石頭幾度分鄉思春色何曾到客邊  
扶杖登樓閒一望南山如舊涕空漣

聞本師空和尚移錫閩中

華臺咐囑久相違杖履何因別翠微五嶺人天遮眼目  
八閩風雨落珠璣執巾若個還隨步揮塵伊誰忽扣機  
慚愧一枝寒塞外黃沙白雪亦霏霏

聞本師將來石頭

孤錫何天不可飛遙知到處足歸依願携半面新神鑑  
來照三山舊帝畿風火大千生佛淚水雲百匝雨花霏  
瓣香拈起人皆仰白月長邊一色輝

寄阿誰

敝屣曾將寄阿誰平生端許阿誰知破齋風雨三更話  
亂世心肝萬古期筆墨有神烈火劫髮膚無恙大江湄  
巫閭白雪巵亭柳遺老孤僧夜夜思

再寄阿誰

三百年來一老臣蹢躅雙袖白綸巾數莖霜雪留前代



半幅江山付後人  
諸祖傳燈能共證  
滿庭流水未全貧  
遙知橋畔梅花發  
極目寒邊欲寄春

得友滄江南信

燈前忽接江南信  
未拆先驚喜復疑  
大漠到來三易歲  
白門死却幾相知  
兩人心事六千里  
片紙書題九月時  
捧讀從頭親切語  
一天冰雪見鬚眉

寒夜偶成

日短無妨獨夜愁  
氍毹布衲自蒙頭  
白楊夢繞尚書塚  
大石雲封仙客樓  
霜氣正濃心匪席  
鐘聲不遠月如鉤  
更長任爾終須曉  
能使沉沉萬古不

歲暮雪中

四十風光一抹收故鄉望斷歲如流料因訶佛填水獄  
豈爲修文上玉樓雪盡埋時偏得句天當崩後更無憂  
當年六載行難滿殃及兒孫冷不休

同諸子宿雪齋

冰天盡日塵縱橫秉燭還教續笑聲今歲眼看片影過  
幾人身在一宵情枕邊各自家鄉近筆下何妨星斗驚  
到曉定知饒別淚土牀如水聽雞鳴

偶感

天地爲圓山水囚無絃一操亦拘幽屬賓尚自容獅子

言集 卷九 三  
石虎真同狎海鷗飽食更無思作佛生還端不願封侯  
請翻青史兼燈錄亦有癡頑似我不

聞浪大師主法繖嶺

馬耳峯頭食蜜甜長干花瓣又重拈共經劫火三禪樂  
分取曹源兩地霑繖嶺杖頭風日眼天山衲底雪霜嚴  
不禁鐘盡懷方切寒雁無聲月一簾

聞遜庵繖嶺監院

何人寒夜苦相思猶憶臨岐贈一枝百丈再叅惟馬祖  
慈明總院屬楊岐出籠孤鶴搏風疾穿市泥牛蹴月奇  
鴨綠江頭頻斫額好將消息寄邊陲

寄茂之二首

髫年見爾蚤登壇瓦鉢藜羹每共飧兩世交游情更切  
七朝耆舊淚難乾孤山未得林逋適後學誰知范叔寒  
料得歲殘吟倦後鐵函偷啟避人看

破屋殘書虎豹鄰蕭蕭風雨獨相親一時羣士推前輩  
半世相交屬古人幾食神仙終不飽屢看兒女始知貧  
冰天欲寄新詩卷老眼應知淚又頻

寄與治二首

亂後投交白板門梅花香飯每同論平生最苦人皆好  
古道全凋爾尚存客到定留徒四壁詩成不厭倒千罇

世間那見清貧士猿鶴沙蟲盡感恩

一卷詩書動甲兵鳥飛魚逝海天驚許多人士欣同死  
費盡精神荷再生書寄極邊看雁度影留孤壁共鷄鳴  
想當花發高朋集獨少殘僧笑語聲

寄與然師

半世風流薄倖名蠻烟琴韻苦冰清後門開處如花散  
大廈傾時集杖橫一幅雲山通性命四圍弓劒見交情  
年來何地堪行脚絕塞思君草履輕

寄孟貞

石子岡頭共苦吟交情老向水雲深孤僧罪案橫詩卷

伯氏遺詞發道心  
婚嫁若完休賣賦  
鬚眉白盡好投針  
連年何限悲酸句  
曾否招魂到海濱

寄于皇

大風吹夢渺無垠  
白鷺洲前彩袖貧  
今古更教誰擲管  
乾坤似未可容身  
鐘聲屢聽寒僧飯  
詩句時生山鬼瞋  
好擬招魂東海畔  
沅湘不獨沒靈均

寄澹心

木佛寒邊尚未燒  
黔王宅畔夢相招  
擡眸直可爍干界  
揮藻真堪賤六朝  
碎却青衫天地裂  
收回殘魄日星昭  
鐵函珍重休沉井  
那見黃塵徹底飄

寄州來

頻年剝啄識相過古寺寒泉笑語多  
劍影千尋依佛火書聲一半落江波  
每當靜夜聞花雨祇恐雄心裂芰荷  
遠磧有懷詩定苦數篇莫遣雪兒歌

寄今度

石頭舊社羨耆英數載周旋世外情  
繡佛放叅貪米汁素王遺訓足藜羹  
中山華胃尊明道五嶽靈祇笑向平  
爲語諸郎拋紙筆無灾更不用公卿

寄一門介立二法主

幾年白拂各橫縱垂死相看道味濃  
人在石頭江月冷

詩從天半岫雲封座前花雨三春夢谷裏松風午夜鐘  
二老有心原不繫鑒巫閭下想飛節

寄穉經

是知不可柰民艱吳楚聲名苦未閒須達布金爲續命  
東坡解帶欲留頑交情只在死生際立德偏于雲水間  
慚愧報恩惟一杖好尋猿鶴步青山

寄爾止兼訊元白彝仲

孤蹤如鶴筆如泉抖擻奚囊淡淡仙賣賦不酬兼賣卜  
憂貧無計獨憂天馬融名下立爲首荀淑筵中實最賢  
想得團團風雪裏共斟白水奠寒邊



寄文寺昆仲兼訊令姪

安世威名海嶼傳，龍泉雖失筆如椽。  
二難拮据尋灰燼，一代風流入品銓。  
枝上鵲巢驚虎豹，枕邊蠹簡剩神仙。  
東山屐齒須珍重，未了還須望阿玄。

寄徐氏昆仲

鍾山王氣散殘霞，猶向烏衣識舊家。  
義士肝腸才子韻，人間富貴夢中花。  
已知麟閣三秋草，何處青門五色瓜。  
珍重玉函天藻在，佇看溟渤又飛沙。

寄無傷

時遊粵中

瘴海南浮去杳然，相期猶在白雲巔。  
鄉情翻爲友朋動，

古韻寧因歲月遷箕子里中魂欲斷越王臺畔屐將穿  
羅浮邨月應無恙未必梅花似昔年

除日大翁同新夷過集

如此年光去不辭市天陰霧約同支因君父子團圞話  
添我家山割絕悲一樹梅花成異想半壺冰水共交知  
春風到底還來日薄暮相看鬢已絲

除夕別皈藏

明曉相逢隔歲期祇爭一宿惜分離論交死地情加重  
定罪寒邊老不疑愁到盡頭寧再換頑深徹骨更難移  
眼看歸路消殘晷眇眇春來未可知

除夜

又到邊庭歲盡時孤燈空照兩莖眉  
三年尚未餓豺虎一息還將報我師  
繞座諸山皆老宿纔言大法已支離  
歸堂穩臥不須守楫桡燒殘冷自知

辛卯元旦

鷄聲雲集禮金僊一搭袈裟泪獨漣  
六載雪山餘業在五家燈火極邊傳  
疎星落落天將曙宿霧重重日漸圓  
自有辦香人不識萬年逢祝海東偏

元日有感二首

老眼未曾看曆日如何歲歲在龍蛇  
相逢知友休相問

不是賢人亦自嗟  
舊臘堅冰仍匝地  
枯枝殘雪尚開花  
新愁又是從頭起  
安得春風到海涯

寥落家家惜曉春  
朔風仍自覓孤身  
恒河流水還生滅  
冷磧飛沙無故新  
西極龍顏心咫尺  
南天馬鬣夢悲辛  
眼看鯨海波濤細  
猶可殘生見世人

遙哭秋濤

雲淙一出人皆望  
天宇頻傾勢莫收  
若水搗唇無二日  
文龍指腹定千秋  
忍將禮樂隨身去  
盡把心肝報主休  
自有容臺遺稿在  
長偕正氣世間留

遙哭玄子

龍髯一墜恨身存  
萬里崎嶇哭主恩  
鄧禹未能追鄴下  
秀夫終合殉崖門  
詞林尚吐文章氣  
沙磧頻招忠義魂  
從此千秋滄海上  
風濤怒捲血猶渾

遙哭美周

一身許國氣無前  
貢水波漫熱血濺  
菩薩道窮皈馬革  
孝廉船覆失龍泉  
家餘老母西方淚  
夢遶孤僧北塞烟  
節義文章渾泡影  
蓮鬚重結後生緣

遙哭未央

飛雲頂上憶同遊  
風雨相期苦不休  
自向虛空明節義  
何妨平等別恩仇  
宰官忽現睢陽齒  
祖道唯懸獅子頭

未了團圞他世事白山黑水日悠悠

遙哭巨源

方筇把贈大江濱垂涕相看各愴神我竄異方生亦死  
君從前代鬼成人西山雨過書堂寂南浦雲橫古道堙  
嘆惜舊遊誰復在獨留雙眼哭高旻

遙哭千里

甘露曾聞飲鄭平肯教弱水隔蓬瀛雲烟淡淡睂間見  
佛祖明明指上生看盡桑田松閣冷拋殘丹竈筆牀橫  
三彭未絕身先死點淚黃沙哭紫清

薪夷暮過

日暮拋書叩我門。土牀呼坐禮無煩。士當縲紲非其罪。  
頑到袈裟不可言。已訝新篇凌屈宋。更叅妙義指風幡。  
鉢中抖擻餘殘粒。帶雪連聲且共吞。

與薪夷同榻不寐

薄被難將笑語溫。枕頭如水覆仍翻。堅冰到骨兩條鐵。  
冷月來牀一片魂。夢趣屢從鄰衲乞。夜深好共老天言。  
鷄聲忽聽休驚舞。只恐輕狂動佛尊。

北里過訪

出門大雪欲何之。僮僕無言瘦衛知。只在南郊三里外。  
定因昨日老僧期。帶圍那得留荒寺。詩句還能慰我饑。

乘興不妨明又到肯因無酒便攢眉

招高一戴三同過北里喜刺翁春侯至兼訂後會  
出門定向北郊行半路招呼冷弟兄羣雁嗷嗷添鶴唳  
幽蘭馥馥共藜羹嗟予嶺海梅花夢羨汝池塘春草生  
薄暮日歸重訂約無過隔日足離情

再集雪齋竟日

如何先遣朔風迎未到驚聞斗室轟三百年來剩一笑  
幾千里外共餘生弟兄冰雪交情熱天地龍蛇老氣橫  
此日不須半點淚且留住佳話付邊城

寒日偶成



三言集 卷九 三  
懶殘獼猴一身兼不合時宜我自嫌荷葉飄零衣又碎  
菜根嚙盡雪方甜道心豈爲饑寒長詩料偏于沙磧添  
滿面灰塵雙涕凍展開書卷向風簷

同諸子集雪齋

此是邊城第一日盧胡大笑卽神仙半收閒論歸燈錄  
全采寒氷當綺筵善謔支公偏墮落能飛丁令忽飄翩  
茆齋西去無多路明曉同過話冷氈

再集高寒還舍

一日已離又一日蕭然斗室忽喧天笑開絕塞三年口  
吞盡寒儒半塊氈冷冷牧牛諸衲子紛紛跨鶴幾神仙

何人袖裏詩篇富，携得寒冰照骨鮮。

是日北里携詩卷至

聞北堡三子爲僦主所逐

六朝遺藻屬三賢，纔得相逢又各天。  
及到極邊重被逐，縱貧徹骨不禁憐。  
溪頭漂母歸春夢，巖下刑人望曉烟。  
但願速來吾鉢在，一匙分取濕寒氊。

生日

當年墜地卽嚴冬，怪得邊城霜氣濃。  
孺慕終身思墓草，君恩累代聽山鐘。  
標鞋獨羨陳尊宿，飛錫真慚鄧隱峰。  
四十已過能幾日，一生心事倚孤筇。

諸子過集

幾人清曉間幽棲喚起孤僧意自迷到處宮牆皆牧馬  
極邊瓶鉢尚聞鷄空談亦可閒消日大笑何能數過溪  
正好團團愁別去土牀依舊冷淒淒

大翁再過

入門先索袖中詩未出還疑句過奇幾日夢思驚鐵磬  
兩人心膽告毛錐斷空祇恐傷天骨霏屑時堪解佛頤  
白水一卮忘久坐童饑任怨得歸遲

有懷

獸炭成灰冷鐵猊孤燈木佛各淒淒已聞嶺海傳烽火  
翻怪邊城靜鼓鼙沙爲雪鋪寒更遠天因雲幕曉尤低

松枝歲歲皆東指弟子于今却望西

過昌黎故里

曾貶潮陽路八千潮陽山水仗公傳誰知一片藍關雪  
又伴孤踪遼海邊佛骨偏能留世道鯉魚今已遍桑田  
當時空自三書重此際應知識大癲

踏水過雪齋

尋風尋雪欲尋誰北里先生睡起遲千片凍雲沉地骨  
一方清鑑照僧眉草鞋易滑肌羸後拄杖忽停詩到時  
便使不禁死亦得枯骸千古浸冰池

讀雪齋新詩

到門白盡兩邊籬獨擁羊裘一見疑半個孤僧連雪倒  
數篇新句忍寒披鬼當哭處予偏妬血到滴時佛更悲  
三曰下來應凍死早成一首哭冰詩

久坐雪齋

蚤過疎雪掛雙眉坐到斜陽雨不知撒盡風顛寧作我  
留將氣骨自教兒一匙每節僧方餓半晌無言句又奇  
從此板扉無剝啄便知托鉢到來時

從雪齋歸

出門一步卽相思依舊崎嶇冷獨支隻雁負霜沙上至  
時光公從野僧將月杖頭隨總來雪窖堪長逞那見龍  
堡中來

津更不離歸到柴局閒未掩啾嘈寒雀共論詩

懷甦築

相思只在海之涯共是飄流墊雪沙到處談經吾有鉢  
對天彈鋏爾無家樹寒夜繞徒三匝腹餓空捫剩五車  
但願上蒼長雨粟從今更不用天花

得甦築堡中信却寄

一紙新傳趁曉風又添寒泪灑虛空雪中一衲朋難共  
飯後無鐘我亦窮胥靡忍饑存海岸武丁曾夢到關東  
他年縱有圖形至只恐愁多貌不同

寄陳吳二子二首

天心邊色總冥濛三子同來爾一翁白眼欲枯重著雪  
青衫已破又吹風但將胃腹長留餓未必文章好送窮  
慚愧老僧餘舌在廣長終不收囊空

形容憔悴氣猶雄携得江濤過海東天網既能羅野鶴  
邊霜偏欲冷書蟲已知筆競湘沉富見說鍼兼秦越工  
此地參苓原有禁可憐文士術終窮

再得甦築堡中信

不見音書已浹旬却疑孤骨付荒榛黃墟暫放文章鬼  
白社還留饑餓民豈有信陵能醉客只餘甘贄未嫌貧  
菜根共咬消殘歲竹杖柴門候早春

再寄北堡三子

相看白晝擁寒衾，餓極方知天意深。但使常垂地主眼，  
安能更入野僧心。老猿或可招新社，黑月應當罷苦吟。  
此處尚留諸子在，何時煮雪一同斟。

聞何懷山延三子度歲

本是蓮花國裏人，黃沙此日暫羈身。維摩有室能容傲，  
須達無錢爲給貧。地下三良魂可贖，山頭一士骨猶隣。  
何時雪底拈花話，方信穹廬別有春。

贈李鍊師

偶爾相逢似舊知，匡牀共坐餽山薇。只應蝴蝶忘愁恨，



莫向人民問是非多病自憐餘鶴骨愛閒無計掩雪扉  
何時得遂芒鞋願白日從君踏翠微

贈苗鍊師

年少如君早息機冰霜爲骨羽爲衣虎溪何可無修靜  
遼海依然見令威幾看桑田添野夢頻炊白石療僧饑  
他時許共騎黃鵠好向浮山頂上飛

千山詩集卷十

博羅剩人可禪師著

書記今羞編

七言律二

懷丁善甫

苦留短髮近如何無地堪容掛綠簑  
山月樓臺愁夢斷江花兒女悔情多  
幸存料自修文塚憤死憑誰棄草坡  
天外故人心未改西風斜雨念殘荷

懷梁漸子

嶺海于今信有渠寂寥楊子病相如  
國人已恐歌黃鳥

詩卷曾無寄白魚馬革縱能饒瘦骨鹿門何處隱柴車  
他年得返販龍洞惟索窮愁舊著書

懷梁非馨

廿年作客白門秋辛苦還家短髮留半壁又虛惟裂眦  
市天何處可埋頭文章自合隨身老貧賤除非到死休  
絕塞忽思酬唱地西湖有月大如甌

李耀寰移家入關

除却妻兒書一束黃沙長揖去飄然貲糧只在雲山裏

耀寰善繪故云

肝膽全傾水月邊回首幾人成白骨入關半步

卽青天愁心豈獨傷離別不得從君鷄犬仙

佛歡喜日

慟哭慈悲古佛前  
蟲沙猿鶴總生憐  
繇來歡喜無多日  
別有閒愁已十年  
絕漠尚教留白晝  
幽魂不獨滯黃泉  
自除鬚髮傷心極  
只恐西方淚更漣

懷關起臯

予舊築菴于宅前湖上

十畝池塘百尺松  
長橋曲曲度疎鐘  
菴前月少孤僧影  
堤畔苔侵墊鶴蹤  
佛手香殘凋木筆  
馬牙烟冷墜荷蜂  
只愁第宅皆新主  
燕子歸來亦不容

聞華首都寺真乘父子無恙

五百何年去不還  
獨留父子守青山  
洞雲龜冷飛黃蝶

砌草碑橫臥白鵬牛鬼已全傾世界龍天依舊擁禪關  
團團莫說無生話縱解無生泪更潺

聞近盧守黃華寺寄示

三把枯茆必不堪林間安得未燒庵日斜尚自敲殘磬  
葉爛何人啟舊函松檜劫餘雲冷淡芰荷秋老衲毳氍  
毹城邊白骨溪邊月一一從今好細參

懷陳燮

長纓欲請戀荷衣躑躅長途劒屢揮親老有身難許國  
天傾無地可肩扉乘槎瘴海空相吊謫戍寒邊苦未歸  
朋好已稀鬚已白不知何處奉慈幃

賀大翁添丁

殘經猶在伴空籬  
艱苦還添舐犢情  
豈爲羶鄉留字種  
又從成籍注嬰名  
數枝照雪堦前玉  
一曲將雛塞上聲  
墮地便隨離亂過  
長成應得見昇平

遊南塔寺

滿堂龍象肅威儀  
絕漠仍存百丈規  
金鐸自天開佛口  
綠楊近水拂僧眉  
儒門淡泊留遷客  
梵宇淋漓讀舊碑  
瓦鉢繩牀吾欲老  
他年應見出橫枝

雨中贈老翁

不知老翁有何好  
大雨還令我到門  
匪獨黃沙親佛子

每因青草念王孫世人空自金銀死似爾偏生藜藿尊  
從此土牀留一尺頻來禮數莫須煩

懷梁弼臣

曾尋彌勒許同龕分手人間便不堪一木自難支半壁  
三徵終不受華簪雲山已破家何在心膽還餘面莫慚  
數畝荒塘天悔禍尚期携竹共雙柑

九日

陰雲低壓殿西頭僧老黃花對面愁九日盡拋前代淚  
十年深負舊山秋繫囊豈解消羣厄吹帽誰堪憶勝遊  
幸有罪夫三兩輩渾天冰雪定相求

重陽集北里大雪

何須佳節亦招尋  
此日團圓雪費吟  
天外鄉關誰更遠  
籬邊菊淚我彌深  
一牀新句添秋色  
數枕寒泉浸道心  
趁此晚晴歸路白  
棲鳥未定響疎林

喜藏主燕回

龍象天門蹴踏回  
驚看屐齒遍莓苔  
陌塵抖向關山盡  
秋水携將雲水堆  
犬亦因人生氣色  
塵緣對客共喧阗  
長安半字休須論  
滿汲清泉且一杯

與甦築同臥敘昔

吹燈忽敘當年話  
一臥長邊苦不辭  
儒釋道同應共逐



君親恩重又誰知樓頭鐘鼓胷中事夢裏河山覺後疑  
抵背夜寒頻坐起探囊猶有舊毛錐

聞詔不果

一面還留三面開金鷄空度薊門來遺黎未死終懷土  
多士雖窮幸不才絕域半瓢仍雨雪舊山萬里長蒿萊  
無拘獨有深春夢夜夜離羣自往回

接與治書

平生相識滿天地此日何人片紙來數點淚彈浸墨跡  
幾年夢去繞梅開土田兒女終浮沫文字心肝總禍胎  
世事一番君已見莫將白髮殉黃埃

甦築新齋成二首

天邊仍舊一經傳  
南郭新看結數椽  
剩有白雲來席上  
隨他綠草到窓前  
詩篇不數開元後  
茶碗還書嘉靖年  
但使主人能愛客  
何妨竟日共留連

不離城郭亦孤村  
白板青袍道自尊  
半掃泥牀延水月  
別從竹簡得朝昏  
初心未遂天何問  
孤骨惟憐我共存  
策杖相過剛咫尺  
對君豈直爲盤飧

贈陳子

長齋無復酒爲名  
累月相依老弟兄  
每以笑談當佛事  
又從水月見交情  
朋黨死地如山重  
儒到寒邊似葉輕

三言集 卷一  
南塔主人能愛客暫將白日付棋枰

五月十八日接本師和尚示札

五月天山鴻雁回披衣三拜寸楸開一條柳標欣猶健  
萬里鄉關嗟已灰座下半成忠義鬼峯頭空剩雨花臺  
人間自是浮雲過簷雀風鈴亦助哀

憶麗中法兄

濶別何年思杳茫一聲孤鴈淚淋瀝想當亂極悲親在  
共愛恩深見國亡書信竟無通遠塞烽烟曾否到禪房  
舊時相識多新鬼只恐身存已斷腸

卽事

吳楚東南舞白題，庾關安得一九泥。  
三岔河畔難乳，五石城中馬又嘶。  
血浸花田新鬼鬧，書傳沙磧老猿啼。  
何時重踏曹溪路，只恐禪宮草亦萋。

得博羅信三首

八年不見羅浮信，闔邑驚聞一聚塵。  
共向故君辭世上，獨留病弟哭江濱。  
白山黑水愁孤衲，國破家亡老逐臣。  
縱使生還心更苦，皇天何處問原因。

莫怨穹蒼太不仁，萬方此日總成塵。  
恩深累代心何憾，命盡全家泪又新。  
殘日沉山猶望旦，落花辭樹永無春。  
尋思最苦身仍在，黯黯風沙愁殺人。

長邊獨立淚潸然  
點點田衣濺血鮮  
半壁山河愁處盡  
一家骨肉夢中圓  
古榕堤上生秋草  
浮碇岡頭斷曉烟  
見說華臺雲片片  
殘枝猶有夜啼鵲

憶耳叔弟二首

抱病多年苦未瘳  
那堪我獨一身留  
黃沙萬里休余念  
白骨全家賴爾收  
舊閣遺編魚腹飽  
空天落月鴈聲愁  
相逢恐是他生事  
極目鴿原淚自流

黑雨屯風折紫荆  
生離死別不勝情  
尚書塚上憑誰掃  
逐客天邊恨未烹  
先代箕裘應棄置  
故園狐鼠任縱橫  
從今好把袈裟搭  
長禮無憂古佛名

遣愁

歎息人間劫盡灰  
惠州天上亦荒萊  
只拚如此家聲在  
無可奈何笑口開  
是處總堪埋骨地  
從今不上望鄉臺  
漫言出世除煩惱  
悟到無生覺轉哀

皇天

皇天何苦我猶存  
碎却袈裟拭淚痕  
白鶴歸來還有觀  
梅花斫盡不成村  
人間早識空中電  
塞上難招嶺外魂  
孤雁乍鳴心欲絕  
西堂鐘鼓又黃昏

贈潔之

我亦頭陀繫遠邊  
羨君來去自飄然  
衆生投虎婆心切

隻杖如龍俠骨堅  
鳴絲波橫杯再泛  
燕支雪盡履將穿  
故人白首詩篇足  
跌坐還同嚙舊氊

接元白書物却寄

來書云從武人手購余小影

天涯珍重數行餘  
問道何因到瞎驢  
得罪以來全喪我  
一殮之外總由渠  
弓刀市上收殘影  
風雨樓頭簡舊書  
見說江南無所有一枝猶得寄巫閭

與治書來言爲徐氏田累寄慰

今時誰復免憂虞  
幾度書來歎力痡  
畫閣已空搜白屋  
小民欲盡索窮儒  
多情自合爲身累  
徹骨惟應與道俱  
無食無兒非汝恨  
殘氊猶可學雙趺

悵望

蒼狗白衣瞬息中  
況聞五嶺滿刀弓  
親朋敢望今誰在  
城郭應知到處空  
蘇子堤邊屍藉草  
越王臺上鳥呼風  
縱令萬里餘殘魄  
那得音書到海東

寄雪腸

曾向江頭見苦吟  
隋堤風雨獨相尋  
生來鹿豕山中性  
死却鴛鴦水上心  
白髮庭闈留彩袖  
黃沙天地裂青衿  
如何問道長邊戍  
血滿袈裟月滿岑

懷薪夷

長劍蕭蕭短後衣  
平生一諾去如飛  
千人性命天何惜



壯士心肝淚亦揮狂態豈宜依輦轂孤身無復訪庭闈  
邊風寂歷添愁思秋月圓時望爾歸

再題甦築齋

案有乾螢箴有魚風來恰受半窓虛一時差勝蘇卿窖  
千古應傳楊子居禾黍已深妨遠目兒童屢進授新書  
生涯只此聊終歲更有何門好曳裾

偶成

中原無地可容身塞外還生有道瞋世惟欲殺稱知己  
我亦自嫌真罪人半榻日光還是睡一瓢詩句未全貧  
鄰翁頗怪癡呆甚飯熟時招喜過頻

咏蠅

白拂頻揮去復回炎蒸無計避涼臺  
赦文不見青衣報病骨先煩吊客來  
苦抱兔尖酣墨汁願隨驥尾絕塵埃  
眼看七月秋聲急滿塞霜飛爲爾哀

贈楊濟明

共是孤身海上山燕支一去不知還  
鴨江已作鴛鴦渚翠幙仍同虎豹關  
桃李種成花更爛詩書典盡粒方艱  
不禁更聽琵琶怨碎却青衫淚點班

遙哭筆山

記得梅花各一篇暗風吹骨淚如泉  
幾年白下予同宿

萬丈黃壚爾獨先，總爲江山能短氣。  
會因病難學逃禪，相逢一笑無難事。  
只恐閻羅亦有邊。

遙哭羣玉

客舍無人促膝時，傳燈勒鼎總相期。  
早知一世心歸夢，恨不當年革裹屍。  
殘墨尚多留白下，孤魂應去到峨眉。  
還思患難君偏切，夜夜天山帶雪悲。

頭

一個頭顱我自題，硬如巖石賤如泥。  
藁街亦可懸皆見，漆器何妨飲便迷。  
磕破人間佛祖小，伸將天外日星低。  
祇今暫把枯茆蓋，休怨黃沙踐馬蹄。

荅

積劫逢人莫肯低最宜強項白猶棲幾乎爲爾成仁別  
幸不同伊認影迷獅子已將償宿債嚴顏何惜擲淤泥  
從來羞比毘盧頂除却朱衣任品題

眼

湛如秋水大如箕何事年來血亂披爍破三千塵數點  
閱窮萬卷電交馳幾人世上休教白片石山頭尚可垂  
此日風沙吹滿面幸留冰鑑照雙眉

荅

千個何曾羨大悲通身皆是頂門奇勘殘佛祖難留髓

看到人民便皺眉百劫春光寧轉瞬兩行寒泪每交頤  
嵯峨石壁幾穿破笑殺西來碧眼兒

鼻

端然嶽立在中央當面逢人絕覆藏世上共推能作祖  
夢中元不羨爲郎聰明久讓安無事定靜唯聞戒有香  
莫爲此時難盡掩故教寒塞歟清霜

荅

上天無臭却相忘穿拽從人也不妨舌拄梵宮甘自下  
眼澄巨海列于旁居亭最愛芝蘭室空洞終爲螻蟻鄉  
一息不來天下事任他蝸角逞豪強

耳

此方惟汝選圓通順逆都忘信朔風不遇神堯休用洗  
再叅馬祖却教聲繁聲若逐同流轉本寂纔趨又墮空  
謾說返聞聞自性琵琶哀怨珮玲瓏

荅

曾聞大呂與黃鐘莫厭巴歌調不同雪後木人深話月  
墓前石馬亂嘶風聲從隔壁釵環墜聽到無絃山水空  
音響不來吾不往十方擊鼓自蓬蓬

口

多言多敗爾惟辜舌在徒然吻欲枯吸盡西江波正祿

說窮大藏字元無三絨不受金人戒午夜時同望帝呼  
嚙雪吞氈知味後肯將鍾鼎易秋茶

荅

千家一鉢亦良圖王膳雖逢味不殊只把笑言當大斧  
虛傳咳唾落明珠睢陽抉齒萬年白若水槌唇兩片朱  
舌上縱饒蓮十丈于今用得半毫無

手

萬里空拳出塞時一枝竹杖不相携翻雲覆雨看人世  
運水搬柴學祖師龍藏搜窮沒可把鳳樓修就亦奚爲  
只今兩肘捉襟見黃葉枯來誰小兒

荅

靈山會上撚花枝  
金色頭陀也不知  
指月幾人能舉首  
捧天乏力自支頤  
空談盡日猶捫虱  
狂夢無端欲截螭  
豈有神方懸肘後  
却思到處起瘡痍

腹

空洞曾無一物遺  
君親兩字尚撐支  
陳公但指知難改  
蘇子時捫不合宜  
二酉裝來寧剩滓  
八絃收入只餘悲  
年來漸覺肝腸冷  
澆盡長邊雪幾卮

荅

銷盡精神獨裏癡  
只今猶自累人支  
松生久絕三公夢



薇採還留二士饑書卷拋殘曾用曝山雲遇著便堪披  
最嫌一點惟明白飲淚吞聲只自知

足

蕭然兩隻草鞋輕肯向如來行處行踏碎神州無剩土  
踢翻靈鷲敢容情下和不泣原非玉孫子雖賸莫論兵  
多少名山存未得又隨風雪到邊城

答

與我周旋一世情無煩劒履夢中榮剛錘亂下骨孤抵  
好月能來屣倒迎列子御風嫌跼踏雲門跛脚發鏗轟  
年來暫把冰霜踐岐路何時可蕩平

身

白雲只合住青山一出青山便不閒  
夢幻了知無大患  
苦甘嘗盡信多艱  
陋形豈羨麒麟閣  
短策真輕虎豹關  
世上滄桑原瞬息  
更因何事淚潛潛

荅

明知旅泊在人間  
刀鋸從他只有頑  
直到極邊方徹骨  
得逢好友便開顏  
百年怪事空中電  
一片孤情海上山  
但使五燈能續燄  
玉門何必願生還

心

吟到先生不可名  
一鉤新月掛三星  
破顏自此成多事

斷臂徒然卒未寧魔佛揀開知夢幻賢奸混合亦頑冥  
只今面日歸何處大雪綏綏下朔庭

荅

無可酬君君漫聽全超寂寂與惺惺黃頭碧眼渾難見  
白牯狸奴賴獨醒代代宗傳燈上焰重重華藏水中萍  
未來過現何從得雲滿峯頭月滿瓶

自輓二首

腸付饑鳥肉付泥勿爲厲鬼開東靷寒氷熱鐵家常飯  
馬腹驢胎爾穩棲心大不須皈淨土骨殘幸免夢中閨  
纖毫銳氣銷難盡只恐長天化作霓

世界三千任所之林林何處不生悲一枝竹杖知難帶  
萬頃愁雲依舊隨定上鼎湖新鬼泣旋歸庾嶺小兒嬉  
多年已是冰霜慣莫畏寒邊苦欲離

讀宗尉寄戴子書有感

隻字翻令百感增看君直欲上雲層世間乃復見朋友  
塞外只今餘病僧孤骨抵窮千丈雪北風吹老一枝藤  
不須重問長安日收拾殘魂臥佛燈

寄贈宗尉

此道于今竟莫論當年鮑叔幸猶存氣傾渤海潮頭水  
手挽陰山雪底魂白草尚多纏野恨黃沙無計借餘暄

人間豈必奇男子肯惜春風散五原

至前一日同諸子過雪齋因聞再舉子

相携莫怯曉風吹盼盼天回一線期田到荒年偏種玉  
松子雪際更生枝因多男子嫌多累不願公卿但願癡  
團坐竟忘寒徹骨敲冰共和洗兒詩

同諸子過壽大翁

邏娑殘魄又重圓霜散冰丸貯瓦盤春草有詩康樂老  
白蓮無酒遠公寒世間應厭長生苦坑底還餘盡日歡  
却憶去年歌笑續漫漫何處淚孤彈

辛卯生日

冷山流瀟幾經年此日看身益惘然  
瓶鉢無心隨積雪松楸有恨抱終天  
裂裾欲續西征記破帽長歌正氣篇  
自笑出家餘習在人間斯道只如綫

壽甦築

不厭人間水半卮獨將枯杖問鬚眉  
鷄窓冷淡存餘雪鹿埜荒沉出別枝  
歌滿關河聊當哭食殘鐵石好支饑  
舊時閒夢應頻見却恨殘年歎未衰

賀弘甫三首

燕支千丈赤雲生寒谷珊珊响珮瓊  
彩筆翻將琴瑟譜金笳吹作鳳凰聲  
香籠寶馬星方爛雪映長蛾山更明

鄭監圖中添五色春風連夜入邊城

玉面珠纓金作鞵桃花如陣錦城圍堂前已見垂垂老  
枕上休歌緩緩歸釵釧全沾邊雪冷羹湯應進塞酥肥  
龍庭亦是神仙窟燭影雙雙舞彩衣

寒冰四面照芙蓉貂氅新沾香霧濃黑水竟通星宿海  
白山化作丈人峯鸞飛未覺三邊險鶯語何妨九譯重  
之子之來誰最望解將雜佩禦殘冬

懷區啟圖

三代論交有幾人十年不見轉成塵肯將白眼看他世  
無復青山置此身隻字俱堪存梵篋五燈終恨誤儒紳

訶林舊社知荒草雪滿關河淚滿巾

懷鄺湛若

雨雪彌天却憶公鄉關無路問冥鴻行藏半在梅花裏  
事業空歸楮葉中已恐鬚眉能作祟只疑筆墨化爲虹  
此身不共滄波去更對何人理舊桐

喜我存病間

病來方覺一身孤未死翻令轉鬱紆被薄每勞風繾綣  
道窮爭怪鬼揶揄枕邊殘卷供饞鼠壁上幽燈照腐儒  
但使昨宵餘喘盡遊魂應到舊山隅

得姚雪庵書



暮鐘破寺逢君處  
瓦鉢浮橋乞食歸  
別久不知生與死  
書來三讀是耶非  
鵝城細雨懷孤衲  
雁磧殘魂憶下幃  
見說弟昆齊向道  
何年同掩舊山扉

得光半雪盛二公書

曾隨花雨卽分裾  
共效楊岐力有餘  
一夜幾深寒下雪  
十年纔接嶺南書  
菩提壇下心難了  
荀子林中月久疎  
聞道瓊崖鞋踏破  
不將沉水寄荒居

讀左公徂東集

秋風一見淚紛披  
可柰重歌出塞詞  
百濟河山愁到處  
三韓文獻幸今茲  
屈平旣放天何問  
杜甫無家別有詩

方信當年身不死，千秋斯道已如絲。

步左公贈韻二首

萬里相逢水一杯，鬚眉霜積面生埃。  
草鞋已破趙州老，布帽新成管子來。  
漠漠寒雲沉大野，紛紛荒雪落空臺。  
幸餘古道照顏色，狼藉牀頭書作堆。

堅冰堪嚼佛堪燒，久矣無心問市朝。  
骨冷自應投大漠，月明猶故照今宵。  
蘇卿杖節寧終海，韓子留衣尚在潮。  
溝洫未填吾與若，空荒天地可寥寥。

贈馬居士

曾向山陰道上行，逢君茲夕淚俱盈。  
吞氈應獨憐蘇子，

滌器何人識長卿半局閱窮田海事一壺消盡古今情  
還期禹穴同探去亂石寒雲併此生

贈李居士

余家東越子西秦沙磧論交亦舊因白雪嚙窮方有味  
黑貂敝盡不知貧虎溪屢過成三笑塵柄頻揮碎萬人  
一卷南華堪卒歲任他滄海幾揚塵